

VENDIM
Nr. 554, datë 24.7.2017

PËR DHËNIEN E MANDATIT TË DEPUTETIT TË KUVENDIT KANDIDATIT TË LISTËS SHUMEMËRORE TË PARTISË SOCIALISTE TË SHQIPËRISË, NË QARKUN FIER, PËR PLOTËSIMIN E VAKANCËS SË NJOFTUAR NGA KUVENDI I SHQIPËRISË

Komisioni Qendror i Zgjedhjeve, në mbledhjen e datës 24.7.2017, me pjesëmarrjen e:

Klement	kryetar
Zguri	
Denar Biba	zëvendëskryetar
Bledar Skënderi	anëtar

Edlira Jorgaqi	anëtare
Gëzim Veleshnja	anëtar

shqyrtoi çështjen me

Objekt: Për dhënien e mandatit të deputetit të Kuvendit kandidatit të listës shumëmemërore të Partisë Socialiste të Shqipërisë, në qarkun Fier, për plotësimin e vakancës së njoftuar nga Kuvendi i Shqipërisë pas përfundimit të mandatit të deputetit, z. Arben Çuko.

Kërkues: Kuvendi i Republikës së Shqipërisë.

Baza ligjore: Neni 23, pika 1, germa “a”, neni 164, pika 2, i ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar.

KQZ, pasi shqyrtoi dokumentacionin e paraqitur dhe dëgjoi diskutimet e përfaqësuesve të partive politike,

VËREN

Nëpërmjet shkresës nr. 1867/1 Prot., datë 20.7.2017, drejtuar KQZ-së, Sekretari i Përgjithshëm i Kuvendit z. Alban Brati, njofton krijimin e vakancës për shkak të heqjes dorë nga mandati i deputetit të Kuvendit të Shqipërisë, z. Arben Çuko, deputet i zonës zgjedhore qarku Fier.

Neni 164 i Kodit Zgjedhor përcakton se në rast të ndërprerjes së mandatit të deputetit, Kuvendi njofton KQZ-në për krijimin e vakancës dhe KQZ-ja merr vendim për dhënien e mandatit kandidatit të radhës në listën shumëmemërore të së njëjtës parti politike në zonën zgjedhore përkatëse, regjistruar sipas nenit 67 të Kodit Zgjedhor.

Kolegji Zgjedhor, me vendimin nr. 29, datë 2.8.2013, ka shpërndarë mandatet dhe ka përcaktuar kandidatët fitues për zonën zgjedhore qarku Fier, në zgjedhjet për Kuvendin të vitit 2013. Sipas vendimit të sipërcituar, Partia Socialiste e Shqipërisë për zonën zgjedhore qarku Fier, për zgjedhjet për Kuvendin e Shqipërisë të datës 23 qershor 2013, ka fituar 9 mandate dhe kandidatët fitues nga lista shumëmemërore e Partisë Socialiste të Shqipërisë për qarkun Fier është si më poshtë: me numër rendor 1 (një), z. Gramoz Kaso Ruçi; 2 (dy), z. Erion Mirdash Braçe; 3 (tre), znj. Eglantina Muharrem Gjermani; 4 (katër), z. Ilirjan Hyda Celibashi; 5 (pesë), z. Armando Subashi; 6 (gjashtë), z. Arben Kristaq Çuko; 7 (shtatë), z. Piro Dano Lutaj; 8 (tetë), znj. Majlinda Daut Bufi; 9 (nëntë), z. Ervin Agim Koçi.

Pas njoftimit nga Kuvendi për krijimin e vakancave të njëpasnjëshme, për shkak të heqjes dorë nga mandati i deputetit të Kuvendit të Shqipërisë të z. Ilirjan Hyda Celibashi, znj. Eglantina Muharrem Gjermani, znj. Majlinda Daut Bufi, z. Armando Nikolla Subashi, deputetë të zonës zgjedhore qarku Fier, Komisioni Qendror i Zgjedhjeve, me vendimin 228, datë 7.5.2015, i ka dhënë mandatin e deputetit të Kuvendit të Republikës së Shqipërisë z. Bujar Avdulla Çela.

Rezulton se lista shumëmemërore e Partisë Socialiste e Shqipërisë në qarkun Fier i plotëson të gjitha kriteret e përcaktuara në nenin 67 të Kodit Zgjedhor, duke përfshirë dhe kriterin e gjinisë. Në këto kushte, zëvendësimi i vakancës do të bëhet sipas përcaktimeve të nenit 164, pika 2, të Kodit Zgjedhor me

kandidatin e radhës. Gjithashtu konstatojmë se vakanca nuk i përket një mandati të fituar sipas pikës 6 të nenit 67 të Kodit Zgjedhor, për të zbatuar përjashtimin e përcaktuar në nenin 164, pika 2 të Kodit Zgjedhor, fjalë e dytë.

Për sa më sipër, mandati i ndërprerë duhet t'i kalojë kandidatit vijues të listës së Partisë Socialiste të Shqipërisë në zonën zgjedhore qarku Fier.

KQZ-ja, me vendimin nr. 337, datë 11.5.2013, "Për miratimin e listave shumemërore të Partisë Socialiste të Shqipërisë, pjesëtare e koalicionit "Aleanca për Shqipërinë Europiane", për zgjedhjet për Kuvendin e Shqipërisë 2013", ka miratuar listën shumemërore të Partisë Socialiste të Shqipërisë për 12 zonat zgjedhore.

Komisioni Qendror i Zgjedhjeve me vendimin nr. 102, datë 29.3.2017, "Për dhënien e mandatit të deputetit të Kuvendit kandidatit të listës shumemërore të Partisë Socialiste të Shqipërisë në qarkun Fier, për plotësimin e vakancës së njoftuar nga Kuvendi i Shqipërisë", ka vendosur t'i japë mandatin e deputetit të radhës në listën shumemërore të Partisë Socialiste të Shqipërisë qarku Fier, kandidatit me numër rendor 12 (dymbëdhjetë) z. Xhevit Qemal Bushaj.

Sipas listës shumemërore të Partisë Socialiste të Shqipërisë për qarkun Fier, kandidati i radhës është kandidati me numër rendor 13 (trembëdhjetë), z. Artur Hasan Çobani.

Nga verifikimi i dokumentacionit të mësipërm rezulton se personit të cilit do t'i kalojë mandati si deputet për në Kuvendin e Shqipërisë, nga lista shumemërore, për të plotësuar vendin vakant të krijuar nga ndërprerja e mandatit të z. Arben Kristaq Çuko, është z. Artur Hasan Çobani, i cili renditet përkatësisht me numër rendor 13 (trembëdhjetë).

Referuar nenit 11 të ligjit 138/2015, "Për garantimin e integritetit të personave që zgjidhen, emërohen ose ushtrojnë funksione publike", vetëdeklarimi dhe verifikimi i kushteve të të dhënave në përputhje me këtë ligj kryhet për çdo kandidat të listës shumemërore për zgjedhjet pararendëse, për Kuvendin, të cilit i takon të marrë mandatin e deputetit për vendin vakant, sipas Kodit Zgjedhor.

Z. Artur Hasan Çobani depozitoi formularin e vetëdeklarimit në KQZ, si organi kompetent për administrimin, verifikimin, zbatimin e ndalimeve për zgjedhjen dhe emërimin në funksionin publik, deputet i Kuvendit.

Nga verifikimi i të dhënave në formularin e vetëdeklarimit të z. Artur Çobani rezulton se nuk është deklaruar asnjë e dhënë që ka të bëjë me kushtet e ndalimit të zgjedhjes në funksionin e deputetit, sipas ligjit nr. 138/2015, "Për garantimin e integritetit të personave që zgjidhen, emërohen ose ushtrojnë funksione publike".

Sipas informacionit të ardhur me shkresën nr. 3244/1, datë 21.7.2017, nga Zyra e Gjendjes Gjyqësore, në KQZ, rezulton se z. Artur Hasan Çobani kandidat për deputet në listën shumemërore të Partisë Socialiste të Shqipërisë, qarku Fier, është i padënuar nga gjykatat shqiptare.

Nga verifikimi i të dhënave në formularin e vetëdeklarimit të z. Artur Çobani dhe informacionit të ardhur nga Zyra e Gjendjes Gjyqësore, Tiranë, rezulton se nuk ka të dhëna që të përfshihet në kushtet e ndalimit të zgjedhjes në funksionin e deputetit, sipas ligjit nr. 138/2015 "Për garantimin e integritetit të personave që zgjidhen, emërohen ose ushtrojnë funksione publike".

Për sa më sipër, mandati i ndërprerë i përket kandidatit të radhës, i renditur me numër rendor 13 (trembëdhjetë) në listën shumemërore të Partisë Socialiste të Shqipërisë në zonën zgjedhore qarku Fier, z. Artur Hasan Çobani.

PËR KËTO ARSYE:

Komisioni Qendror i Zgjedhjeve, mbështetur në nenin 23, pika 1, germa "a" dhe nenin 164 të ligjit nr. 10019, datë 29.12.2008, "Kodi Zgjedhor i Republikës së Shqipërisë" i ndryshuar,

VENDOSI:

1. T'i japë mandatin e deputetit të Kuvendit të Republikës së Shqipërisë kandidatit të radhës në listën shumëmemërore të Partisë Socialiste të Shqipërisë qarku Fier, z. Artur Hasan Çobani.
2. Ky vendim hyn në fuqi menjëherë dhe botohet në Fletoren Zyrtare.
3. Kundër këtij vendimi mund të bëhet ankim në Kolegjin Zgjedhor, pranë Gjykatës së Apelit Tiranë, brenda 5 (dite) ditëve nga shpallja e këtij vendimi.